

Одговор начелника Јасмина Мусића на писмо Линте у коме је тражио да општина Кључ укине Обавијест о одржавању зелених површина и помогне да се у српска села доведе струја и изграде путеви

Poštovani,

Vašim dopisom od 24.06.2025. godine reagirali ste na obavijest Općine Ključ, odnosno Komunalno — vodnog inspektora, broj: KVI -29 - 06/2025 od 05. 06. 2025. godine, a koja se odnosi na obavezu održavanja posjeda koji se nalaze uz javnu površinu, što je propisano Odlukom o komunalnom redu i sanitarnom minimumu, te izražavajući poštovanje prema Vašem angažmanu u pravcu zaštite ljudskih prava, a posebno povratnika i nastojanju da doprinesete što boljim uslovima za život ljudi na području općine Ključ, obavještavamo Vas o slijedećem:

Općina Ključ nije donijela nikakvu novu "Odluku o održavanju zelenih površina", već je putem sredstava javnog informisanja građanima dostavljena obavijest o obavezi održavanja njihovih posjeda koji se nalaze uz javnu površinu, kao što su javni putevi i sl., koja obaveza proizilazi iz Odluke o komunalnom redu i sanitarnom minimumu koju je usvojilo Općinsko vijeće Općine Ključ u 2019. godini. Ista Odluka je objavljena u "Službenom glasniku Općine Ključ", broj: 10/19, a izmjene i dopune Odluke objavljene su u "Službenom glasniku Općine Ključ", br. 7/20 i 7/24.

Valja napomenuti i to da Općina Ključ do sada nije upotrijebila nijednu represivnu mjeru prema građanima u okviru primjene gore navedene Odluke, a donošenjem iste Općina Ključ je ispunila obavezu propisanu zakonskim aktima iz oblasti komunalnih djelatnosti koje su donijeli organi na višim nivoima vlasti u Bosni i Hercegovini. Također Vas obavještavamo i o činjenici da su iste odluke donijele i druge lokalne zajednice na području Unsko — sanskog kantona i drugih kantona na teritoriju Federacije BiH.

Cijeneći Vašu predanost ispunjenju gore navedenih ciljeva, slobodni smo Vas obavijestiti da je navedena Odluka Općinskog vijeća Općine Ključ donesena u cilju obezbjeđenja pravnog okvira za uređenje životne sredine, što je jedan od prioriternih ciljeva u procesima integracija u međunarodne organizacije kojima teže sve države regije, pa je slijedom iste Odluke dostavljena obavijest o obavezi održavanja posjeda, koja se odnosi na sva pravna i fizička lica. Međutim, znajući da su određeni građani napustili svoje domove, Općina Ključ u takvim slučajevima uglavnom koristi druge metode koje nemaju za cilj primjenu represivnih mjera.

Iako jedinice lokalne samouprave nemaju nadležnost kada je u pitanju izgradnja i razvoj naponske elektro mreže, obavještavamo Vas da naselja koja spominjete u Vašem dopisu uglavnom imaju obezbijeđenu električnu energiju. Prema informacijama koje je dobila Općina, manji broj domaćinstava — pojedinačnih slučajeva nemaju obezbijeđenu električnu energiju, ali će se u skorije vrijeme pristupiti i aktivnostima u cilju izgradnje elektro mreže do objekata koji to nemaju. Također Vas obavještavamo da je veći dio magistralnog puta prema Sokolovu asfaltiran, a lokalni putevi su makadamski kakvi su bili i prije napuštanja domova od strane lokalnog stanovništva. Općina Ključ je opredijeljena da izvrši modernizaciju i navedenih lokalnih puteva, ali budući da ova Općina spada u red nerazvijenih općina u Federaciji Bosne i Hercegovine, nažalost nemamo kapacitet da to realizujemo vlastitim sredstvima, te su nam za isto potrebna i sredstva donatora (učesća građana ili viši nivoi vlasti).

Upućujući zahvalnost za Vaš angažman i napore koje ulažete za ispunjenje plemenitih ciljeva za bolji život građana naše Općine, izražavamo nadu da ćemo u skorije vrijeme biti u prilici da zajedno realizujemo infrastrukturne projekte u tom cilju.

Broj:02-45-1599/25

Ključ, 17.07.2025. godine

S poštovanjem !

OPĆINSKI NAČELNIK

dr. sc. Jasmin Musić